



partii naleraq

24. april 2019

UPA2019/172

Nunatsinni plastikkinik atuinerup annikillissarnissaa anguniarlugu Naalakkersuisut kingusinnerpaamik UPA2020-mi suliniutissanik iliuusissatut pilersaarusiamik saqummissinissaannut peqquneqarnissannik Inatsisartut aalajangiiffigisassaattut siunnersuut. Suliniutissatut pilersaarutit anguniagassartai tigussaasuussapput iliuusissanillu ilaqartinneqassallutik. Pingaarnertut suliniutissatut anguniagassat EU-mi plastikkinik atuinerup annikillisaaviginissaanut pimoorussamik suliniutaannut appasinnerussanngillat.
(Inatsisartunut ilaasortaq Mimi Karlsen, Inuit Ataqatigiit)

Inatsisartunut ilaasortaq Mimi Karlsen Inuit Ataqatigiit, siunnersuuteqarpoq Nunatsinni plastikkinik atuinerup annikillissarnissaa anguniarlugu Naalakkersuisut peqquneqarnissaannik Inatsisartut aalajangiiffigisassaattut siunnersuumik tamannalu oqaaseqarfigissavarput.

Nunarsuarmi tamarmi minnerunngitsumillu nunatsinni aamma ajornartorsiut annertuujusoq ulluinnarni anigutta takusinnaasarparput, plastikkinik aallaavillit qanoq amerlatigisut maaniinnarmiittut, tupinnartumillu tassuna aamma takusinnaavarput avatanngiiserput qanoq soqutiginnigilluinnarlugu inuusinnaasugut, tamannalu akisussaassuseqanngitsuliorneq akuersaaginnarlugu inuusinnaanngilagut.

Pinngortitaq allanik taarserneqarsinnaanngitsoq nunagaarput issittumiippoq sunnerneqartarneralu minngutitsinikkut annertuumik innarlerneqarsinnaasarluni taamaattumik akisussaaffeqarnerusumik atorlugu nakkutigissagippat assortuutigineqarsinnaanngilaq.

Ukiorpassuarni pinngortitamik uumasuinillu atuisuuvugut, kisimiillutalu atuisuunngilagut illersugassagut pingaarnarpaat tassaapput uumasut inuussutigut aammalu uumasut nujuartat nunamiippata immamiippatalu paarilluarnissaat akisussaafferujussuummat. Uumasut piaqqiorsinnaasariaqarput pinngortitami minguitsumik uumaffigisinnaasaminni, Aalisagaatigut inuuniarnikkut tunngaviunerpaat ilagisaat aamma mingutsaaliuinikkut annertuumik illersortariaqarpagut taamaattumik avatangiisitta akisussaassuseqartumik illersornissaa ataatsimoorullugu suliarisariaqarparput.

Nunatsinni puussiakut kisimik ajornartorsiutaanngillat eqqaavissuit ilaatigut ingasaginarsinnaasumik nakkutigineqanngitsutut ittut sukkanersumik iliuseqarfigisariaqalerpagut. Upernakkut sila kiatsilluni aput aaleraangat Minguk qularnanngivissumik aamma ulorianartorpassuarnik akoqarsinnaasooq immammut kuinnartarpoq tamannalu tamatsinnut toqqissisimananngilaq aaqqissuussiffigeqqissaartariaqarpullu tamakku tamaasa ilanngullugit.

Ilungersunarnerpaajusarpoq ilaatigut umiarsualivinni batterikut uuliakut maaniinnarmi seerisut takusarlugit, nunaqarfiit ilaasa eqqaviini uuliakkut maangaannaq kuullutik immamut aniarusaartut pissutsit tamakku massakkumiit sukannersumik iliuuseqarfigisariaqalerput isiginnaaginnarnagit.

Plastikkitt suulluunnit arlaatigut qanoq killilersimaarsinnaanerlugit nalilersugassaapput, ilaatiugut immaqa pisariaqarpallaangitsut tikerartittarpagut, amerlasuullu ilaatigut pinngortitamut ajoraluartumik igiinnarneqartarput silami eqqaavissuit ammaannartut taakkuupput aamma annertuumik ajornartorsiummik pilersitsisartut.

Eqqaaveqarnikkut aaqqissuussiniarneq nutaamik aallartinneqalersoq soorunami pissanganartutut isigaarput neriunniartalu pissutsit pitsaanerusut illoraap tungaanut aallariarfiusussat pilersinneqarumaartut.

Akisussaaffeqarpugut uagut massakkut inuusugut eqqarsarluarnerusariaqalerpugut pinngortitaq erlinnartoq minnguitsoq pigiinnassagutsigu sukaterinissaq ataatsimoorullugu suliarisariaqarparput.

Uagummi kisitta atugassarinnngilarput, attartuinnarparput aamma kinguaatta nangissammassuk atuinertut, taakkuinnaangillat uumasut naasut avatangiisit silaannaq imerlu sumiluunniit minguitsuunissaat illersugassaraarput akisussaassuseqartumik uagut kisitta atunnginatsigu uumasut inuussutigut aamma annertuumik illersussagatsigit.

Kinguaatsinnut oqarsinnaasariaqarpugut. Ilissi pillusi nunarput paarivarput.

Taamatut oqaaseqarluta siunnersuut tamakkiisumik taperserlugu ataatsimiititaliamisuliarineqarnissaa innersuussutigaarput.

Hans Enoksen